



1 4  
1555  
228

228





門 14  
號 1555  
卷 228

昭和十九年  
四月十日

梧溪集卷第四上

江陰王逢 原吉

雲山萬重辭 有引

雲山萬重者廣平張民思親之所也民侍父懋夫爲  
福寧時承命還省祖壠兵興道梗莫克迎養因扁是  
名於千山別業以寓陟岵之懷及福寧君歸數年來  
而不忍易是扁且徵福建省郎中魏郡秦景容氏鋪  
繹其事秦復爲民致書席帽山人王逢以歌詩請逢  
辭曰



雲山分萬重山與雲兮不期而同膠盪軋芴兮夢寐或  
通陟彼帖兮焉從親奚在兮在閩王之故封雲山兮千  
里山與雲兮紆謫此虎干戈日尋兮日遠滄瀛瞻彼旻  
兮曷已親奚在兮在須女之遐鄙始雲山兮越秦茲雲  
山兮主賓幸安全兮來歸感孝念兮精純鼎有禱兮盤  
有鮓松之陰兮干之下嵐霏裾兮空翠晴流素輝兮堪  
攬把庶頤神兮葆年寄丹衷兮騷雅

白雲一塢辭

有引

白雲一塢者西域馬公文郁隨所寓之名也公頽然

蒼儼秀潤嘗爲潁州著廉斷聲拜南御史會亂遂變  
名雲林子黃冠野服超然物外蓋十餘年矣一日過  
海上逢心知其賢敬美是辭辭曰

白雲兮一塢山之閒兮林之下氣鬱積兮常素寒黯流  
泉兮愴終古塢之人兮土苴紱組顛潛有鱗兮瞻戢有  
羽彼蒙塵兮顛隳茲含光兮延佇諒觸石兮有心龍之  
不來兮曷滂其雨

山舟辭

有引

山舟者華亭干山周氏子鏞鎬藏修之所也鄉貢進



上陸君宅之首爲序浙江提學魯君道源次爲詩規  
美至矣延平總管秦景容氏乃爲楚音其言曰人知  
兮山不可爲舟曾不思水載地游又曰山有舟兮不  
可以濟龍在野兮孰與治世逢讀而感焉因矯其意  
復補一章辭曰

天有船兮在河潢檣析木兮柁扶桑乘剛風兮元氣象  
大地兮川梁君之舟兮虛器川弗涉兮山是憩林空人  
兮積水白龍森寒兮來下戲自非聖哲兮莫濟亂危維  
德載義兮姑俟其時高宗傳說兮遠而精誠感格兮夢

或見之玉芝兮石髮爛駢生兮海月君採以遺兮慰我  
心渴將送君析木之津兮扶桑之闕

漪南草堂辭 有引

漪南草堂者予友葉生杞釣游之所也杞先世京口  
宦族有別業淞之吳匯大父鏌父以清咸隱居好義  
杞讀書負材謂前太史楊瑀守建德辟掾辭兵興會  
進士及第李國鳳經略南土杞密陳時事十條李嘉  
納所言遙授進義副尉鎮江路丹徒縣主簿將別任  
之而柄移藩鎮矣杞築草堂魚鱗涇上扁曰漪南祕



書卿貢師泰為序江西提學楊維禎江浙副提學魯淵為歌詩予擬楚音二章辭曰

苔碕兮蓬屋魚鱗之漪兮一曲渦盤兮泐洞風舒徐兮水波縠巾青天兮琴滄浪招白鷗兮送黃鵠匪濯吾纓兮匪濯吾足懷賢其渴兮誓將心沃

紉屨兮布服蓮葉其舟兮魚鱗其屋雲淨兮天開蘋白花兮草豐綠何曲曲兮鈞鉤將恢恢兮網目仁義是漁兮愴口腹腹不人累兮人誰吾辱

秋堂風露琴辭 有引

至正己亥得是琴於杭名以表德辭以寫志云耳辭

曰

月明兮庭空援琴兮堂中耳濯濯兮冷風風行兮涼度月來兮堂阼心湛湛兮零露草綠歇兮鳴鳴木黃落兮潦清兒築場兮婦葺笱庶有享兮粢盛

汎宅辭

滄浪兮獨客自名其舟兮汎宅身大地兮同浮心靈源兮靡極天高虛兮氣清灑挹星月兮光上下本不狎兮海鷗素相違兮野馬春一度兮桃花醪漁蠻兮魚社



將歸三首

梧桐生朝陽鳳凰鳴高岡嗟我羈旅人彌年獨彷徨非  
不善走趨玉珮垂雙璜君侯多車從瞻者亦輝光如何  
日同游忽忽我鬢蒼衡茅龍江上兒耕妻蠶桑夜來得  
家書云當奉烝嘗去去甘貧賤苒露沾衣裳

盡歡非全交去國難潔名中心默揆量惟有歸爲榮張  
翰不知幾直待秋風生陶潛懶束帶千世莫與京故邑  
變大荒墳隧走狐麋徘徊久幕下荷及得無情天未厭  
亂離且復寄傭耕安得周處將從之斬蛟鯨

金洗必以鹽錦濯必以魚越石無晏嬰寧免厄道途我  
生千載下乃讀先秦書既非今所貴盍不賦遂初海鳥  
集魯門風鷁退宋都麻衣白皜皜青山繞吾廬醉從接  
輿歌醒學甯武愚尚愛湖水清臨別更躊躇

馬大沙館舍病後畱別陳氏昆季三首時己丑歲  
日腳浸深江暮色先著樹回風戀叢薄幽響不蹙駐羈  
人臥齋館壹鬱秋已度十口江之南一飯屢外顧冥冥  
烏領白眇眇鶴髮素夜久蛟龍移沙洲莽煙霧

開門風欲來衆木斂寒色蔓草緣歧路零露秋向白千



金生戚醮斗祿疲形役倏同草木腐何有名教益參伐  
挂簷閒絡緯秋四壁兀坐燈復親孤光委今夕

天空無織雲銀漢鏡面瀉芒星煜煜動霜氣橫萬瓦尋  
常恨伊威蟋蟀北牖下青熒樵爨火黃落墻垠野絺綌  
淒以風刀尺念當把家山限一水杭葦不待假薄田庶  
有秋雞酒會鄰社

避亂綺山謁子方先生陸公墓

我經冷水灣缺月照微服景非度秦嶺事類避同谷松  
深聞無煙狐兔紛竄伏隆然四尺土卷卷在東麓問是

先生墳感慨逾慟哭洵書失歐陽蕢對多馮宿許韓兩

耆舊

許益之韓明善二公

時論推鼎足憶過先人廬白駒駐脩竹

周情與孔思小子幸私淑天回晨星稀世亂烽火屬心  
言采芳藻中宵不盈掬太元屬桓譚九歌繼宋玉抱膝  
獨長眠披榛忍南逐

遊鯉山

山舊名由里

鄉山三十三遊鯉奠郊南巖然獨高大秀掎東諸嵐土  
剛蓄炎精厓仄削劔鐔我嘗挹飛翠遠在滄江潭波濤  
與伏興雲霧相吐含恍然穆王駕八駿左右驂又如琴



高仙腳踏朝蔚藍久思更徽號新喜遂幽探太白賦九  
華後來成美談狂歌繼其武林澗免愧慚春風綠瑤草  
秋霜紅石楠行將脩月斤爲鑿避世龕蛟龍正格鬪鯤  
化誰其堪

次鰕妾岸

朝辭鳳巢村晚次鰕妾岸起望大角閒太白光有爛方  
雁杜陵苦未已崔旰亂鬢毛掠蝙蝠竹裏鳴鷓鴣同曹  
迫憂悸相視名錯喚前途非樂土殊昧賢達算誰家繚  
崇垣輓轡臥井幹餘歌久悽惋酣宴同清晏寧知楚幕

鳥不宿吳宮燕蕭晨理舟楫回首重悲歎

遊梁鴻山簡孟伯茂巡檢及其子爚

求田泰伯里卜室梁鴻山山雨微灑塵清風滿柴關竟  
夕上玉氣破曉開蒼顏樹合陰畏佳磴緣石巘岵桃花  
照春空淥酒生紅瀾鶴辭瑤池苑來遶青琅玕本非神  
仙流得盡霞外觀故鄉久蕪穢頭白終生還當時歌五  
噫聞者心鼻酸晤言同遊士伯鸞在人閒

望大小貢二山

大貢如大人小貢如小臣大人方正笏小臣亦垂紳太



湖七十山而此我所珍清淑萃閒氣端厚凝風神嶽露  
蓮一朵海偃月半輪遙分馬脊秀近尊蛾眉真岫幌敞  
素夕雲蓋擗高晨深容虎豹隱幽絕狐兔鄰將軍山名  
雖相望邈若越與秦我行柯村外紫翠忽鮮新不無靈  
異棲飛渡招隱淪洶洶白水波杳杳清路塵芳萼被中  
沚采之淚盈巾父老昧鑿識謂我諸侯賓我豈諸侯賓  
均是天王氏

同鄭本初基訪吳庠鄭明德教授元祐俞叔鉉學

正鼎教授畱飲齋中是夕雪因相與聯句以記一

時會盍

中吳泮宮古廣文官舍敞佩衿方休誦逢冠帶駢憩

歲晏雲四合祐雪暮霰交響飛廉勢簸揚基滕六影下

上汗邪畢潔淨鼎塊軋周滌蕩若將混端倪逢無復別

封壤颯沓竹末俯祐碑兀木本強漏壺咽銅龍基城堞

臥素蟒冰漸靜膠研鼎顛氣深達幌香乾芸散帙逢味

永壘凍盎擁褐肩獨聳祐擊鉢技爭癢詩盟得寒郊基

茗飲失粗党路迷梁園邈鼎地去程門文殊憐跼驢背

逢頗快衣鶴氅沈寥度郢曲祐浩漭泛剡漿流風注存



心基叔世入紆想成遙戰瘕苦鼎野曠爪牙攘好音懷

鷓鴣逢怪物絕凡麴願追文正躅祐不辭慶歷黨層雲

皮諸經基直道擴羣枉新知春蘭藹鼎舊游瞻星朗謙

虛側臯比逢欲寡賤熊掌張燈初筵秩祐舉爵朋酒饗

黃羞登俎柑基白薦作羹鯨鯢齒先一飯鼎探錢罄餘

帑清宜禪僧分逢瑞許賢守賞螟蟻殄無類祐來牟熟

有象陰塞天光發基陽復履道長高視吞八九鼎獨立

配參兩幸敦君子交再極厄逢丘仰

青青孤生麻

青青孤生麻不假蔭松柏貞莖瘁蓬藿物性還日直汝

州曹彥可大字擅鄉國蛟龍出笑談雲煙溼牆壁虜逼

書旗號怡然別親識心正筆不回骨冷血化碧日落河

岱迴野史實我職事傳秦太常四座為變色瓦全一時

幸玉碎千古惜端人何地無安得環轍跡

葛虛中丹房雨坐遲劉衷道士

仙都十日雨溼蒸致微疾凭几問金丹掃地焚蒼朮蝸

行亂草上鷺隱嘉樹密不見劉崇虛蕭齋坐捫膝

故禮部侍郎古括范公挽辭諱霖字君澤一字天碧至治辛酉卒年六



鳳凰無凡雛騏驎無凡駒鳴岐與產渥必待天人孚侍

郎唐相履後括譜遠通蘇與文正甫睟服斬衰母孫訓

以儒長授父祕易律歷百氏俱宋亡邑弗靖徒步謁咬

都元帥計聽魁就戮田里釋千俘世皇既召見神采動

玉壺賈晁不世遇京管竝駕驅嘗謂國脩短乃繫帝賢

愚暴虐亡羸秦仁義治有虞衆貂製裘帽八珍繼醜醜

宮炬金鑄蓮禁地青規蒲恩光去天咫所器嘉言謨一

薦十七人乘遽將臨吳夢母報已歿侵星戒歸途抵閭

如其夢孝感驚妻孥江南范秀才名自九重呼大用本

天意小史謂除應時需鑿鑿正統論歷編年圖時相

本朝繼金為正統公言金媚者雖得沮士擬古董狐成

宗御六飛萬象新洪爐超遷五品貴兩省垂範模謂除

江西屣倒張珪中丞手握徹理大夫儀曹試經濟政府

匿瑾瑜遠引臥雲壑獨潔辭潢汙蠶室客暮醉鯉庭子

謂公幼朝趨笑命說三禮翛然竟長徂北風日云涼繞

樹莫匪烏屏營獸居野盛德仰在予族貧均家財兵亂

全姊軀何幸覽遺橐追挽為操觚



故南臺治書侍御史劉公挽辭 諱貞字庭幹晚號知止翁辛丑年卒

七十

鄙夫昔避兵船居虎丘畔注懷臯伯通受知劉公幹賓

禮甚倒屣自享非大案顧惟陋白茅期以藉玉璫于時

屬州 謂常熟 陷守將病無算袂分裁信宿城破及黎旦承

佩都漕章躬先于越竄卻缺義救鄭張耳尋降漢載紆

東浙籌不忝宗臣晏朝廷簡勛舊省憲望改觀始懲頓

螯手終如鬲脫絆 公嘗任浙東廉使既除江浙參政南臺侍御以病辭隱居閩中 八閩

佳游遨花明天機段幔峰露浸浥劒水雨徐漫決老歸

善里偷逝神不亂惟公家益都先世彭城貫冰檠操清

苦厓壁氣魁岸故吏記石畫列郡服山判駸駸蕭曹業

咄咄顏柳翰敷歷四十年進退符易象幾多因名位桎

梏死獄犴少挹賢達風足免赧恧汗青徐隴尚隔霜霰

物屢換蓬深仲蔚居地冷中散鍛安貧庶全生酌酒重

三歎

故祕書卿宣城貢公挽辭 諱師泰字泰甫號玩齋王寅年卒壽六十五

公為天使時弭節大江北上以祝帝釐下以訪幽側邦

侯首子薦遂命屏檠戟身先匹夫禮義重三生石君山



視吹臺酣游小八極許厠文翰場涵泳堯舜澤興言及  
親老臨別深惋惜既自中銓曹復拜裏行職龍門競登  
進牛衣方偃息熒惑犯歲星時公守平江聞去民社責予亦  
浮私屬相望烽火隔震澤定逾年荐獲展良覲恩加喉  
舌地柄總甌閩役詩書化斥鹵清慎奉王國賤跡何足  
稱嘗側丞相席阮籍任放曠邴原病剛直蠅驥信可依  
鵬鷄各有適豐城張華劔柯亭蔡邕笛此物甘棄材志  
士感精識青宮念師傅宣室思討益不意坼中台榮光  
冷東壁南湖墓木拱鹽海甥館闢雲車從臾馭來往旌

慘色安得神降庭銘碑表先德

公嘗許撰先君庫使墓碣銘

故遂昌先生鄭提學挽辭

諱元祐字明德以右管疾左書牖尚左生

處土星夜明先生生處州六經胸淹貫百氏目漁蒐筆

繡絲五色花樣從購求器大晚始成兩辟東諸侯謂太尉張

公憲子謝通顯客隱琳宮幽偃僂杖履聲枉過話舊游

幼遷西湖學淳祐餘前修薊林平章廉公竹樓左丞管公閒弦歌

繼觥籌甲科趙期頤中書參政趙公負笈衣躬樞偶覽姑蘇臺

遂成賈胡雷克莊廉使韓公幣遠至兼善狀元泰公禮逾優家立

四壁寒身視二頃秋健兒俗尊貴老儒時贅疣而父我



所銘倘死思我酬涼日照銀杏風鶴層雲頭罷酒一笑

別仰俯歲忽周起起鄭元邁咄咄殷浩休緬憶分教日

示橐雪燈篝聯軒孝義什磊落數名流梓行世未能詩

挽淚莫收鬱鬱石門山故隴曾祖克宗西川經略使祖開先知道州永明縣阻

且悠橘霜淨屋洞劔虹光虎丘好驂干尚書千柳待制公文傳柳柳公

貫轡遠拉虞文靖虞公集黃文獻黃公潛軫超然地下樂邈矣塵

中憂

故江淮財賦府副總管致仕彰德路同知章公挽

辭諱元澤字杏甫晚號歸來翁乙酉生八十五卒

大盈合吳淞古鎮夾龍鶴二江名公承郁國裔宋文簡甲公得象

舍聯里落十七職將命謂首擢中書宣使萬里同納約周王舊

轍環彷彿跡馬脚稍遷和林部爭識炎方鶚區脫罷章

程雷犁撓醜酪煌煌日月袞岩岩絲綸閣鳴鶯落花閒

及茲壯遊樂書從親所至每句輒應諾丞相以孝聞三

命日舞躍千艘賁滬瀆別乘過鄉郭憶飛湖山雲民蘇

江淮瘼庭闈累封郡昆弟四僮爵垂老告老歸鞫膾奉

如昨五福世獨備盛事天畀作義莊羅繁檜鬻官麗丹

膺公建清忠書院孤臣揚文載慷慨生死託故侯踵青門耆英



尚東洛急促弦衆斷貞固金自著憶予避地初霖潦船  
久泊曬書借場圃田畷爲悚愕感公遣使候張具厚非

薄及見契一言匣劔砥礪鏘不圖援葭葦

平妻文簡公從父團練使

文彬十一世孫女公爲文簡公十世從孫

遂忘美藜藿大兒娶甥女

見掖娶任月山

宣慰孫女公之甥女也

莫鴈殊中雀嗚呼公云亡客淚濺素幙河

陽遠巡狩海上掀颶鱷房杜遺後悲榮名挂寥廓

故南臺侍御史周公挽辭

諱伯琦字伯溫號玉雪坡真逸七十一卒

周氏饒望族自宋世德茂鶴林臥麟岡山脈萃芝秀篤

生侍御公猶駢在天廡襁抱器大父

梅山先生青佩齒國胄

諸經內淪浹百氏勿研究鸞鳳暫枳棲鸞鷲尋羽造冰

銜十職館相府六衣繡荐掌西曹兵兩聽南垣漏灑京

侈篇翰海嶽肅籩豆太子端本時古傳躬口授遂致問

龍寢罔或爽雞候江東遭亂去吳下爲時救非同使尉

佗常存論廷湊時將臣寓公垂白竟拂袖朝廷整風紀

堅志起不復嘉魚兼蓴菰小塢蘊巖岫短巾杖琅然消

搖幾心嚼齋雲樓始燬承露盤既仆新亭對泣暮錦衣

獨歸晝祿賜無贏金鄉飲惟醇酎含淒歌黍離委順正

丘首孔殘直伯仲張綱孰先後逢也楚狂人頻年展良



觀拙詩序高文家訓贊大籀楷書河清頌儼若臨九奏  
興來赫蹏賤往往法急就數謂麋鹿姿合置文王囿桑  
樞原憲貧飯顆杜陵瘦有懷感長笛無才傳耆舊玉雪  
梅花坡寒盡想春透脩脩豹尾車昨夢過圭竇朔庭煙  
草豐靈其祐巡狩

送丘阜之江東省大姑匡節婦同上海廣福寺講

主瑛石壁南阜道院姚草樓外史賦

二詩附

船頭柳條碧船底魚尾赤寡姑斷徽音老父同胞憶父  
扶五尺藜姑垂雙鬢絲何況乳養恩在子年訖時子行

爲姑壽烏鰲期回首母使老萊衣淹溼長干酒

青絲驪色駒秣陵慰長姑姑孀三十年於義母不殊  
嚴君聽郎去躬奉雙白苧外表貞素姿中紉離憂緒  
姑感親親情報之玉珮珩遊子雅不好前多狹邪道

右瑛賦

丘郎一幅布帆風云省大姑江水東仙家二月碧桃  
滿人世幾回青草豐練衣如霜鬢顏好見姪身長念  
兄老千里書還墨未乾三茅峰高雲可掃

右姚賦

贈沈耕雲



佳士謝吏祿心耕九山雲雨餘暗流泉石田上網罟不  
與牛馬運甘同麋鹿羣千日酒春熟黃鳥醉中間

題章鶴洲所藏瞿睿夫鈎勒蘭

有引

睿夫名智婁江人博學善詩以書法鈎勒蘭尤妙絕  
爲太史黃潛提學段天祐編修李孝先外史張雨所  
友重累遷文學官攝紹興錄判尋棄去云

我夢陪羣仙尻輪神爲馬咀秀蒼梧岑集芳洞庭野水  
雲秋澹泞月露夜清灑畫者何如人沖心良獨寫

題虞奎章贈劉希孟先生琴序後

有引

先生諱世賢宋丞相忠肅公四世孫中書舍人朔齋  
之曾孫也先生承世家流風遺澤以琴專門著稱名  
公閒戊寅歲雷江陰數過家君欲以平生所得意御  
風騎氣二曲授逢逢時篤志讀書每告以授未晚也  
今先生沒已久矣竊嘗怪嵇康之廣陵散斲而不傳  
及瀕死方自悔責先生斯二曲蓋不在廣陵散下推  
其盛心賢於康遠矣辛丑秋先生之子伯容仲禮會  
逢於雲間曹貞素故第因謂先生過愛若此伯仲忻  
然取琴爲奏前曲各一行且出奎章虞公琴序示之



曰願述序後爲來者美談逢述已復請詩詩曰

蔥靈日披猖章甫遂淪墜聯翩忠肅後相逢良深器英  
瑤出瓏璫珠星見旒綴橫琴貞素館心神傷遺世薄雲  
行蘭臯清露落松吹而翁久仙化難忘二曲義伏讀奎  
章文如坐夔龍肆廣陵無遺響良冶有賢嗣尚愧柳柳  
州執筆先友記

山中詞四首贈鄧筠谷鍊師

溪風過微雨巖花裊幽芬不意數聲磬驚起半簷雲龍  
虎嚴守關天人真與羣樂哉居山中木石符篆文

山升月數尺水木弄妍光適來清冷風吹落沆瀣漿石  
上瑤草氣澗阿丹霞房猿鶴不我猜朗吟自成章

碧寥含霜色石林散秋清羣峰金仙髻一瀑玉女嬰樵  
牧煙外語雞犬雲中聲冥心採芝茹何辱復何榮

五官謝紛拏萬象歸鴻濛烏雉瑤水上免浴暘谷中永  
卻斑白毛飛步玉雪童神功妙何測林壑遺清風

元夕夏老圃席上會全希言張如心沈伯脩諸葛  
彥飛蔣蕃分韻予得馬字

華月照廣除春寒薄生野新歡念此離餘緒陶文雅縈



梅溪集卷四  
歌竹葉裏顧影梅花下大笑市童癡風燈走人馬

題竹石幽禽

霜禽啄梅花片片亂香玉驚著乳鳩棲飛下琅玕竹畫  
得詩家妙物趣方兩足詩畫意俱忘閒庭草交綠

席帽山先隴圖詩 有引

山本黃山東峰之別名距江陰城北六里與馬鞍山  
相屬曾祖昌諡先生大父潛昭居士大母徐氏先君  
庫使妣李氏 諱靖 墓東西相望焉至正乙未冬不肖  
逢不幸避亂於外渡五年矣顧烽煙遼隔不得以時

祭掃因託江東提學睢陽朱澤民為圖浙江分省郎

中天台陳基為序仍自賦一章示兒夜攝拊周永其

孝思焉

春林烏鳥啼墓上開棠梨清明寒食近子孫各提攜行  
行黃山道山光明素縞纓炙奠酒漿羅泣紛拜掃幸得  
緩緩歸及此風日好頻年喪亂苦莫甚我鄉土連村十  
萬戶存者僅可數石羊石馬羣亦已臥榛莽於乎我先  
坐目斷魂魄聚木落氣返根天寒水歸源豹死義首山  
狐死首丘原汝曹昧斯理苟全奚足論作歌與孝思不



繫圖畫存

得五妹消息因寄一首

階庭玉蘭樹開花屬春莫雪豔曾幾何風吹辭本處玉  
蘭豈獨爾有妹鍾陵去生死誓同夫路難不復顧大江  
潮兩程想到石頭城團圓便是樂貧賤莫關情汝嫂目  
新暗汝兄病猶嬰鄉村文史二村名閒菟裘庶其營為妹  
向夫道歸農小山好班超萬里封燕頰非草草

喜長女孟芸至

女兄相繼亡女弟復異鄉長女忽歸寧庶寬離思腸去

年中吳園錫城屹孤望大勢臨叵測薄命全彼蒼二雛  
抱且攜嫁餘素裙裳淚添新啼痕瘦減舊容光為父致  
桃菊為母具蘭湯湯以沐香澤菊以祓不祥五暑風送  
音今朝春滿堂彼美綠窗芸蔓葉葦巖霜詎不欲終護  
物性託東陽良人固貧窶老姑尚康強桑青麥雲黃燕  
燕雙回翔

讀郭孝子傳

傳附

堂構務崇基士瞻務戡冠文辭外風教市娼街春妍有  
宋郭孝子負母亂兵閒白刃加害母懇拜淚漣漣天地



鑒素衷里問慶生還相望橋梓蔭各終樛櫟年守臣上  
厥事卹典違所敦章公老太史心惻嘗筆援迄今歷兩  
朝讀之竦如存浩浩元化流忽忽世俗遷穢雀巧織巢  
安知鳳孤鴛興歌非爲郭期與作者言

郭孝子名汴字失其傳臨江軍新淦縣人也建炎間  
狄人深入盜煽起汴居縣東南五十里盜卒至劫汴  
母責害藏物既脅以火加慘酷焉汴泣告願以身代  
盜義而釋之郡以聞會行在務殷卹典未遑也汴沒  
始有表其墓者凡郊赦縣令奉詔祠焉慶元史官南

郡章穎撰

讀呂節婦傳

傳附

德人言足徵文人言多靡緋桃豔陽花冬青歲寒抵孤  
藤萬歲名所以松上倚於平呂節婦喪亂全幼稚馬不  
被二鞍中心猶止水長終復何言見錄顏樂胡所居士  
士貞婦潔竝金葵光有煒荒園雪久溼敗竈煙稍起呼  
兒讀遺傳清風生頰齒晚來興彌高聊歌續貂尾  
節婦呂氏婺州永康何頎季長妻也何爲郡著姓呂  
氏名清年二十九季長逝去有一子二女子述生甫



三月時江南寇盜充斥人死兵戈者十七八呂氏能  
保育其子若女且全其家人勸之再適則自誓曰馬  
不被二鞍况人乎死而後已聞者疑笑後卒遂其初  
志郡邑長吏文學博士奉旨備醪餼禮幣表其門同  
里胡長孺撰

讀貞燕記有懷魯道原提學 記附

天涯老孤臣想像賦貞燕空梁泥屢落故渚自冰泮影  
託明鏡鸞夢接長門鴈飛雲軒不歸自語清商怨  
元貞二年雙燕巢於燕人柳湯佐之宅一夕家八以

燈照蠹其雄驚墜猫食之雌彷徨悲鳴不已朝夕守  
巢哺諸雛成翼而去明年雌獨來復巢其處人視巢  
生二卵疑其更偶徐伺之則抱獨之殼爾自是春去  
秋來凡六稔觀者譁然目為貞燕云長沙馮子振記

義鄧

吾鄉有鄧添千里負主骨晨夜竄草間宛轉皆虜窟胼  
胝苦何辭性命閒一髮日車昏盪裊虹暈或抱月魂氣  
相衝塘鳥獸亦猶狻經過百戰地青春暗消歇深幸主  
有靈全生及城闕主母悲喜集流淚心激越主妾事他





人空庭自花發主昔爲龍蛇公論不可沒但感衣食恩  
疎戚均賞罰在家爲義奴在軍爲義卒庶幾銜土烏尚  
愧擊蛇鶻淒淒薦霜露哲哲上參伐不見秦舞陽悲風  
動天鉞

贈黃將軍中奉其故主將邁里古思判樞母夫人  
歸吳分韻得煙字時歲戊戌

丈夫重知己富貴浮雲然壯君仗公義歌詠儼古先報  
仇韓張良卻敵齊魯連昨者邁判院樹羽塗山顛三苗  
喪精魄萬民歸陶甄斬馬柳鄂州餉客郭通泉外蕃久

側目臺諫實隘咽長城乃自壞曰氣貫南天君輒討有  
罪鴟鴞厭腥羶賊圍亦潰散畏君親披堅黃金雙佩刀  
福禍劃回旋挂之祖道左泣挽士五千梅花映素衣獨  
上東吳船念彼鶴髮母哭兒螢按前萱草暮晷迫薤葉  
春露懸豈無一犁牛躬耕石湖田日惟勸加餐樂以卒  
歲年今茲喪亂際俗壞教益廢式瞻偉事業前後何其  
賢大澤冰已泮舟鮫弄珠蠙我幸攬餘光校讎圯上篇  
贈君當載馳爲國靖烽煙

上黨有寡婦時後至元二年



上黨有寡婦秉心義且貞誓不暴夫惡甘受殺夫名頻  
年困縲縶五府來公卿惟中李柱史哀矜得衷情剖棺  
重驗屍胸骨金珥橫故主認失物茂宰崇門旌太行脊  
中原黃河流元精仁風慶雲被麟萃芝羅生地秀鍾壺  
儀四方揚頌聲道人儻鳴鐸好自姚都城

排難行贈王子中

相如全趙璧子敬存家氈臣子奉君父由來義當然我  
爲排難行期播今後賢至正十六載楚氛蔽吳天南臺  
塔御史盡室方顛連風波萍浮寄墟落匏孤懸內無蚩

蜉援外絕鴻鴈傳縮地漫勞想拔宅欲假仙形勢轉倉  
皇一日猶三年君聞急友義側身入烽煙得子猛虎穴  
摘珠驪龍淵菱花奩影合桂樹月魄圓青青驄馬駒環  
珥映後先相看喜至骨欲語翻淚漣報之錦繡段長謝  
賦歸田遂令雞鳴客遠愧齊魯連我時載茶具蕩漾五  
湖船蕭蕭春陰暮載歌伐木篇

弟子篇贈張大椿伯陽

俯仰天地閒莫重君親師民生事如一世亂多乖離近  
託采藥游聊以觀俗嬉張也吾愛友盛事彤歌詩儒先



金昌伯授業羈貫時相違三十年再見忘老衰下榻橋  
隱堂開校蓮渚湄青燈續舊夢綠醴潔新卮絕筆俄物  
化啟牖爲輿尸桐棺斂士服丹旌表靈輻鄉隔煙樹遠  
帆上寒潮遲長路衆執紼悉借東風吹其殘泣呱呱痛  
極感亦隨紛紜馬上郎結納帳下兒卒死豺虎鬪弗免  
蠅蚋悲師道苟斯立家國反掌治緝成弟子篇忠孝同  
少裨

送中政院判買住昂霄使淮浙二藩還京

採珠極桂海採玉窮冰天志士取功名盍走萬乘燕侶

仰玉節郎匹馬雙龍泉恩光赫徼外德音承日邊二府  
饒事畢再拂珊瑚鞭別我冥鴻亭卻話三年前煌煌金  
虎符婉婉綠綺弦當時苟顧戀安得登祁連河汴氣湜  
融嵩華青眇縣陝輝隴頭月閩接潮陽煙非比漢中興  
尚論周東遷上無勞土木下無媚胡祆六宮親蠶桑鈞  
軸秉化權本齊源亦徵四方自蕃宣持爲使歸獻庶懌  
心悃悃綠竹吹粉香野櫻紅露懸翩翩黃羽影落碧  
梧蒨醉灑北上行宿陰適高褰壯游豈不美親老幸錦  
旋山林訪故舊我種吳淞田



贈高彥禾

有官貴全城無官貴全身賢哉愚全子讀書宛溪濱花  
開迎燕社花落送鶯春何心同谷叟甘分葛天民憶昨  
甲午秋長鎗頰烽塵鬼哭竄中夜雞鳴度蕭晨禾少農  
馬智實多造化仁向來佻巧徒各已腐荆榛依依越南  
鳥采采吳下蓴丘嫂禮遇至難兄衣食均端居淑諸生  
長揖辭憲臣誓爲特立士白首佩璫玟與我林泉交視  
我肺腑親寒郊陰風迴日落雙醉巾浩歌遂走筆世亂  
無憂貧

贈魯道原縣尹時客授璜溪呂氏大兒掖從讀春

秋

河決多橫流世亂無完家由來鄜州月照人生戚嗟郎  
官有故鄉宛在桐江涯兩邊久荆棘孤村自桑麻慨想  
回文機永夜燈垂花殷勤王母使時復降紫霞佳兒侍  
元方弟子進侯芭鞶帶寒執經綵衣日將車竝期登龍  
虎殊鄙註蟲蝦諸侯不能臣忠義抑爾嘉北風健駟馬  
南斗通靈查再陳喻蜀檄閭里被光華

贈南臺掾普罕仲淵兼簡浙憲副察級士安



騶虞謹踐履鳳凰慎棲息丈夫出處閒身名寶金石維  
時戊戌秋念君苦行役體被縲縷衣面帶嵐瘴色義不  
事二姓蓋是稽古力白頭一心人亂世成棄擲空涼閨  
門邸置酒寬愁臆女牛限明河年年會良夕龍津雌雄  
劍終焉如合璧南垣視兒子願言加飡食出糟鵝掌紅  
登市菱筍白長吟寄忠憤短策探勝迹部使問山人因  
之道深憶

贈張俊德教諭彥中錄事

王陵一代英徐庶百世士功名繫遭逢孝誠本天理吾

友兩孝張其先西<sub>門</sub>氏眾方冒國姓而獨變夷禮兄猶  
困雞口弟嘗躡龍尾出處矢弗違安危視同體前年甌  
人橫竄竄越南鄙仰事惟君親彷徨曷能已挂帆藉風  
姨扶輿拱山鬼艱勞千百狀息心飲谷水登堂拜大賓  
列帳坐弟子鸛鵲三銜鱸春冰雙躍鯉雖加晉楚富未  
忍彼易此綠林氣凋傷玉雪見穠李謂李忠襄殷勤報二難  
安排書五始

贈窮獨叟

窮陰結長寒木介河生漸曠野獨獸號異鄉孤臣悲薛



衣帶胡繩三年限朝儀豈徒無炊火顧有麻斬齊身幸  
免汚辱言之淚交頤脫急藉朱家弔古懷要離溯風酒  
三爵老氣吞畎夷誓剗梟獍肉用塞烏鳥飢漢酬張良  
志吳乞伍員師行歌獨祿篇以繼從軍詩

歲旦未起宋安道稅使袖至倪元鎮書因述懷荅

倪

不食妾婦魚寧飲廉讓水善學柳下惠魯有一男子茲  
辰屬新正高枕辭賀禮忽得隱淪書矍然攬衣起隱淪  
盡散金賤跡痛掃軌薪炊竹根葉盤具園中薺貧病無

一錢老幼逾百指寒雲下微雨聊閱晉唐史陶顏何  
人所慊飢乞米寄言物外交仙山噉瓊藥

曹生煥章爲畫席帽山人小像自題一首

我生太平時濯濯春月柳兵興數避地短鬢若蓬莠本  
無萬年相曷煩二毛手粉墨妙且精韋布老殊醜九關  
去天杳大林落葉厚歸歟臥雲根兔夫哆箕口赤腳躬  
煮藥一力助耕畝尚友復何人樂志論一首

題嘉定故朱禹敷妻徐氏卷

孤鴻不再雙飲啄南北野彼美徐妙正不離空闥下簾



惟度霜月寒采流酒竿歡樂儼夢寐及覺淚橫灑大雛  
禮初習小雛筆試把誨教仰叔氏庶期繩儒雅鳩拂精  
陰桑鴟遠墓門檟蘆溪寡婦笱日復奉姑酢亂離世去  
寧福祐天所假我歌大塊閒以愧二心者

畱姚泳元鱧山居題其所性齋

蒼蒼幃圓宇盤盤載方儀君子萃才美莫不原秉彝狂  
象貴有鉤生馬貴有羈跳躑林末狙安得馴致之老我  
儉德堂仰頰每嘒斯節義世大閑我友躬踐持敬親急  
兄難矧敦古書詩干戈久搶攘習俗多變移豐屋書闕  
鬼重城暮號狸艱阻同備嘗堅白不磷緇霜草萎四野  
風葉鳴前墀一燈照細酌於焉寫冲思漏長井絡高大  
星角揚睂聊題所性卷皓首雲山期

題烏涇夏孝婦葉氏妙真卷

翁姑視父母孝敬無異轍先王禮防微復有男女別吾  
鄰夏冢婦姆媪爭播說翁初病重腿既痿七歲月搯湯  
俯滌穢操簞躬致潔寒燠昏晨閒問候罔違缺良人事  
巫祝出昨晚笑割婦也具酒漿婉婉罄懽悅庭莎泣零  
露野芳亂啼鳩西丘地下姑及茲翁同穴高桑八九樹



載念姑培孽青裙襞積衣重溼新淚血涇橫泥自烏井  
古泉自冽詩亡聖悠遠竊誦規世末頌罷見孤雲心神  
亦飛越

常州軍幕中偶白兔郡儒築城頓兵之擾凡百十  
戶及還多士義請畱不果因謝別一首

野青氣蕭條花落被廣路長河血流水稜接淮楚暮金  
鍾古名邦強者今得據重城萬工役寸晷百洵懼吾黨  
章句儒奚堪畚鍤具甌空四壁在幸復罷兵戍論交義  
咸敦取別情獨遽棲棲馬羈破戚戚虎穴度班彪西河

閒本爲生民故一言寤竇融中心實歎慕

遊昆山懷舊傷今一首

丈夫貴善後事或失謀始桓桓張楚國挺生海陵一  
門蓄大志羣雄適蜂起元珠探甕社白馬飲浙水三年  
車轍南北向復同軌量容甘公說情厚穆生豐誓擊祖  
逖楫竟折孫策箠天王詔褒贈守將躬歲祀翼然東昆  
丘蘭櫟映疏綺青蘩春薦豆翠柏寒動棗乾坤宥孤臣  
風雨猖五鬼銅駝使有覺荐懼臥荆杞

登昆山寺謁劉龍洲墓

吾溪集卷四上

无知不足齋叢書



木溪集卷四  
陰厓驚裙披蕭寺壓其左前無容馬地而公靈永妥縛  
有高世風荷雷誓埋我懇懇中興論汎汎岳陽舸竹西  
旌佩閒爲士非瑣瑣我來行吟久顧影歎復坐下上百  
年餘同遇時坎坷疎嵐冒川暝歸鷺跼跼墮怒焉上孤  
舟星流亂漁火

遊卜將軍墓祠將軍名珍字文超唐西河人有功  
業在昆山民至今祠焉

時危短吾裾薄遊東昆野有唐將軍瑩肅肅風露下木  
葉金甲動土花碧血灑居然神兵棲夜嘶石麟馬二

顧首尾勢若無禦者當時陣或然威福巫得假靈烏拂  
人首疏火散村社澗澗婁逝波壯懷託申寫

讀僧惇朴菴松石臺爲其徒智升題

有序

惇黃巖人趙宋宗室裔先輩胡石堂之門生也性介  
潔不樂茹腥血因祝髮爲沙門壯游金陵與五峰李  
孝先竝受知梁王一日公引柯九思見柯以寫竹遂  
親幸王卽位獨召用柯李後送公詩云月行天中央  
天高如屋極中有雪色兔下土人不識我曾摩其須  
仙吏睨我側世人乞毫光密如霧雨塞蹴踏河漢搖



洵湧若秋汶是誰知此奇南有彌天釋去去不復念  
令人淚橫臆若不能無慨者而公兩主名刹退老雲  
閒心易筆史有山林宿儒氣習佛業師行稱於名緇  
以壽歿今其徒升謁示公松石橐凡如千篇於金陵  
時事則無一及之榮念蓋灰如也升子鄉子弟也有  
請爲公述大略兼和李一首

世殊老復至懷賢思彌極靜觀惇公詩巖姿悅曾識蓋  
茅白雲與結軫彤邸側酥酪味殊珍葑茹飢可塞脩脩  
隻履邁古渡幾潮汐松偃石泐泉對月卷忍釋大鵬才

亦無山雞銜文臆

題伯顏守仁教授竹石

有序

守仁蒙古氏至正甲申以禮經領江浙鄉薦中書下  
第例釋褐出身守仁由是任宗晦書院山長繼長二  
戴書院復豪占田二頃有奇代流滯十年再中壬寅  
鄉貢第艱於北上丞相達識公權授安定院長平章  
張士信尋改爲烏程教諭累幣請不赴明年有大臣  
言之朝始勅除平江教授時士信柄政守仁遂放游  
九峰三泖閒託寫竹石以自見志節在寒苦內士咸



高之子聲之詩云

廣文窮益堅竹石研池出勢卻虞人旌籟隱伶倫律渭  
川春暗雨淇園寒落日鳳深蒼梧雲茅簷花復實

吳城破後門生羅育自睦走無錫遷母胡氏葬還  
書至海上寄唁一首育字得英

亭長屏前及州尊停羸馬子負後母函相送東門下十  
年地瓜裂飛翼恨難假雌雄決甫聞匍匐違一舍日新  
照歸旄山舊餘老櫓幽關永安靈明昊將錫嘏葭長連  
霜海草白慘風野披書爲起立亂久孝彌寡子病莫致

芻西望醜三瀉

岳鄂王墓木皆南向平江張師正知事命工圖之  
爲題一首

昔僑嘉會門嘗謁鄂王墓二樸儼喬梓十八松夾護一  
壁青天豁半嶺靈籟度席然卷旌頭槩若列武庫勢回  
退飛鷁神悅獨屏樹適來卉衣巫載陟苔花乍遺像雖  
土木快觀猶披霧還鄉驚草昧臨衝乏才具思得背蒐  
軍少展常山步憂長家從隱髮短歲復暮溪園黃落深  
多爾特我顧粲粲岳林圖依依棲霞路物性本莫齊英



氣實攸聚月中劔精起想像罷虎踞以袖敬拂拭老淚  
忽雨澍成固謝妙工壤或恐內楸龍雲與魚水艱哉君  
臣遇益使澹蕩人終身樂韋布

過柰山聰禪師道場同曦南仲送昭晦巖上人遊

五臺

踈齧神駿姿一日千里馳道林愛成癖蓋抱才不羈惟  
昭東余士十載蠅鑽紙夜形駱駝夢欲飲流沙水茲爲  
五臺別其山絕惱熱鷲采照春冰羊角搏夏雪塞向鵞  
歇鳴啟戶綠暗樾空中青猊駕雲端寶花闕地昔安坐

具石壁光發素北朝旃裘君無復荐遊豫凡所相屬妄  
自見性乃悟聰老望歸來金精立雙樹

畱曦上人會海禪林送體用菴上座遊南岳祝融

峰

名緇五臺英將登祝融峰杯俯洞庭小一螺媚山容雲  
衲灑飛瀑霜磬度疎松扶桑旣入望老對夕陽春

慈報寺長老南岳雲晝雲山圖松圖各有詩予次

韻

空山不知春白雲莽昏曙幽磬迴已沈詩禪愴自悟溪



影流一花月明在雙樹

石間孤生松天涯特立土相看雨滴翠似聞風落子駕  
言歸去來白雲滿蒼苔

題葛溪權以制所撰孟志剛夫婦誌後 有後序

亂世多橫途濁浪無清潄匹夫與匹婦終始良苦心夫  
比一寸膠婦比一寸鍼物性稟自天用去濁指南莽莽  
陳鄭郊切切桑濮音康瓠瓦缶閒復見古瑟琴霜颯颯  
短褐寒雲闕窮陰節義鎮相望老矣梁父吟

孟志剛者絳人也當忠襄王駐陝時剛客授澠池既

汴平圖東歸計又授徒汴西門無何以疾卒學徒斂  
未殯妻衣氏囑匠斧大棺學徒舉疑之曉夜更守衣  
氏乃盡殺雞醊祭畢慟哭以割牲刀自刎死鄰友薛  
方合諸徒葬之西門外初剛挈衣氏自陳避兵來汴  
病飢行販彰德而汴彰相繼陷不相聞二年遂閒關  
至洛將趨汴訪求之俄稠人中有呼剛者剛顧則衣  
氏也泣謂曰妾曠違夫子市丐廟舍得不戩辱而復  
聚此天也剛亦泣偕依鄉人河南判樞麻李公居焉  
公嘗物色一妾勸剛納之曰平時我州南孟氏二百



口今惟剛在且久無子若不聽卒老窮獨宗祀責誰  
歸剛辭曰有子無子命也匹夫匹婦義也守義俟命  
尚他慕哉逾年歿所性直方每面折人人不之怨尚  
先生元素蓋其師云以制名衡江西人今隱居淇上  
筍無頭有引

筍無頭記夢也已亥歲子遊杭丞相達識公用薦者  
言擬擢爲蕭山尹尋病還而蕭山游羅兵革始悟筍  
無頭蓋尹字也因補是辭

夜夢竹筍兮無頭精神恍惚兮莫測其由山川慘容兮  
風雲爲愁若有人兮告子不可畱苟貪祿兮曷免悔九

書儉德堂左斷石

使爲砧兮孰配以杵使爲砥兮孰承以柱使爲磬兮孰  
編以簾厓斬壁絕兮志士獨與飢渴可療兮薇蕨同煮  
最閒園東復闢荒地藝以菜麥名曰青園作青園

辭

園始荒兮草棘園旣闢兮菜麥食新可望兮饑也云除  
田弗澇兮甌亦有儲賢者過兮蔬飯於舍我無嗟兮無  
謝



西霞一首書斡山石壁上

西霞在岑慨日則沈言息予心薄煥我襟西霞在麓捲  
鳥則宿言駐予足薄暖我目維聖學易維賢知非將泳  
道涯卒依德輝載引之領載翹之首願焉斯霞以化春  
酒

題商皓圖

紫芝膺膺白石楚楚風泉嵐霏交寫互吐於四老父以  
延以佇以歌以舞爰宅幽阻匪幽阻是宅有誅偶語青  
松渠渠瑤草塗塗簡出深居窺麋鶴狙於列仙癯以讌

以娛以嘯以呼爰友樵漁匪樵漁是友有適左閭篤生  
于周考終于劉商不羸赭斯豈人謀匪人伊天其德之  
酬歲逾邁矣霜雪孔稠我心雲鴻曷日云休

我田憂澇也予有田在橫泖辰字圍雨甚憂形於

辭焉

縣上無聞兮汶陽不治我田孔卑兮霖澇載罹蛟鱓王  
兮陸爲宮天戴地履兮曾饘飽弗充噫假使歲稔兮孰  
愈道豐

擷于晡



擷于晡維蓼及荼倚于旭匪柏則竹風撓林兮露零坂  
攻苦勵節兮愀獨往返天道不遠兮汜歲之晚

響石二曰豐鍾曰泗磬各刻之辭分置林泉

豐鍾曰德瑀璜音琳瑯應素商天迨霜歌幽章慶金穰  
泗磬曰山儲英水凝晶夏球鳴激以清文運明諧大成

炎風辛亥五月作是年四月十三日得男孫

炎風兮赤日載花兮木筆樞一蒂兮三實文翰兮是膺  
簞簋兮是承尚期兮來仍

木客圖爲董竹林山長題

有柯者斧有力者斲子子荒寒胡不歸處阿房方作烏  
迴飛翰大索工師山木是刊星奔霆驅血指背汗從此  
逝兮猶馬釋絆其食杞枳其衣蘿葛甚雨疾風匪巖伊  
穴涼宵佳時滿引流霞鸞笑仰天猩舞戴花子意招之  
頭若爲掉程石載秦雖倕罔效藥使人海吏隱曠塵風  
嚮景從子非凡倫非凡蓋仙有道不死式瞻遺容庸敢  
追詠尚弔爾坑鬼

登鐘賈山淨行寺靜初上人棲雲樓爲題辭一首

仰山兮樓閒秀吾食兮雲吾攀俯樓兮山上雲層匝兮



天樂殷響繁高閒兮愴心迹伊雲山兮自主客羈薦葛  
兮潤瀉柏寒清凝兮輝顯白一氣籥兮上浮八絃條兮  
周流邈與鶴歸兮弗應龍求濁世翩翩兮富貴可羞將  
棄違兮筆研杖往來兮蒼翠之幽

莆溪蔣蕃季碩壽萱堂詩

有堂維茅于莆之原有悅弗藻北維樹萱厥義何居味  
性滑溫母氏食之百憂用緩子祝福母由天賦善我作  
歌詩匪頌伊勉維萱黃榮維萱綠黃子子芳蕤日清風  
夷柔嘉孔儀實子之婉怡維萱綠黃維萱黃榮中心惇

惇風夷日清靜閒孔貞實子之孝誠莆流云長葢後于  
澤堂基云崇葢土于積學猶殖也萱兮培德萱兮培德  
后葉昌奕奕

華西一曲辭題楊生士中別業

巾脩脩兮鬢秋步冷風兮歌游睠華水兮洞脈涇烏浦  
黃兮獨湛澹田穰穆兮隴桑苧喪賻耕助兮由義之府  
返窮狷兮故林脫孤鶩兮數呂鑣連軌方兮狹斜仆壤  
子不徑竇兮有蕙其帶野淒露兮天肇霜誦且弦兮中  
堂春載陽兮相攜河梁



有竹美雲間沈德輝煥卿也德輝嘗從先人游旣吏  
祿於邑多所平反而退隱竹庭之下以樂子易之孝  
養焉

有竹青青匪郊匪坵君子之庭庭不容馬杖屨其下風  
露清灑于亭壽嘏有竹離離匪巔匪嶺君子之墀墀不  
容輶輦枕其幽炎歆邈悠于樂燕休欲稽之食必歲其  
力欲德之植歲必其百藐軀兩閒好生則均嗟彼厚祿  
邊保厥身維竹有稗維君子有嗣尚歌衛詩庸濟世美

有竹 有序

誰狐荅一村張子政窮寒荅天變之作

有靈曰誰營巢占風曾謂吾人靡誰之同有知曰狐涉  
渡聽冰曾謂吾人靡狐之徵吾人滔滔乘馬丹轂弗範  
而馳致顛汙覆嘉林之下黝然寒泉被褐于隱時邁世  
遷霜露霰雪天其教也貧賤憂惕士胥倣也士胥倣也  
誰狐是蹈也

味易杯 有序

易惟四卦言酒而皆當險難之時予備嘗焉幸老至  
矣名杯曰味易仍刻詩杯之槃曰憶昔月初生踰關



衆欲兵黑風櫻市虎白浪掣湖鯨石筏宵孤露梁山  
暑病行天其佚吾老味易遲時清識其略耳蓋未足  
歌樂之乃載歌曰

拘美兮易演厄陳兮道闔聖迹悠兮莫踐未濟與坎兮  
因需姑味酒兮吾生之餘海月其亮兮天風其徐

貪山歌聞門生薛復田廬其下懷歸感昔賦以寄  
之

鄉山東遮兮犬牙銜屹神秀兮奚名爲貪我嘗徑度兮  
加策鈍驂義不畱兮士之攸嫌聖過盜泉兮忍渴弗取

墨舍朝歌兮孝去勝母處獨絕縻兮殉節死歐飲犢上

流兮尚推潔犢口彼皆然兮德維其有夫圭玷兮貴鏹

衣垢兮用澣愚莫愚兮怙惡賢莫賢兮遷善於茲山兮

有隅尤介若兮不污顧依本兮美物更曰廉兮匪踰羣

分兮彙聚綺黃二山名賓逆兮君山名望江濟鯉山名游龍兮

前駢翫殿跑兮鹿芴乳事並見郡志嵐曉曉兮含丹昕峰高

寒兮灑翠氛乃儲雲蒼雨不屑澤下國兮氣饋如兮孚

尹草豐縉兮木潤液貊鶴胥來兮豕蛇遑息嗟神往兮

夢歸疇縲子兮藥石紫芝燧兮商顏煒客星隱兮富春



美璞玉剖兮荆岡慙蕙帳虛兮鍾阜恥誓將巖棲谷壑  
以彷彿夷展之赴躋兮二三子兮操杖几尚箋兮飛廉  
謝山靈兮躡履

林泉民歌贈無錫張相夢辰樞明經修行累辟病  
辭

若有人兮西神顏辟蘿屋兮松桂關佩詩書兮服仁義  
馨斯挈兮采是闕穿虎穴兮攀鳶巢洞扉呀兮泉響交  
山鬼嘯兮木客跂光曠曠兮來雲旂琴白石兮自弦衷  
壹鬱兮于宣楚狂去兮蒼姬衰商綺隱兮羸炎煙文與

道兮就隕孰千鈞兮一髮引睠枯落兮弗盡加斧斤兮  
曷忍百實秋兮三秀春老益學兮亂能貧信禮樂兮在  
野天將啟兮遺民

石林一首贈琴友劉仲禮

何山無石何石無林石崇林深有我有琴三代禮隳遺  
音則雅烏百斯騫樂莫知者石氣上齊林沐時雨流液  
薦蘿被澤蘅杜白露旣滋蒼峭黃萎龍蛇伏坻歲聿暮  
而玉攻材菟我卒懷矣無慍無悶庶幾君子

題戴崧先府君良才諱善行號蒼山處士小像

有



歲已亥兵薄括處士命子崧挈母先八山及返迎處  
士兵大至燔城崧冒燹觸刃瀕死者婁且哀告軍物  
色父所在害獲免時弟洛將處士竄溪南山處士謂  
同難者曰吾一褐以老未嘗垢與其蔓草同穢不如  
滄浪清之獨也徑投於溪洛救不克亦死崧蒲伏與  
母葬之武溪原以洛耐躬廬墓餘十年而慘怛之痛  
思慕之切猶一日也復繪處士小像託前進士顏守  
仁徵挽章永嘉曹新民教授有曰菊帶晉愁香不改  
松輕秦爵老猶青予曰

兵貴戢兮不戢何爲父蹈水兮聲餘鳴悲由也盡思兮  
哀也廢詩惓惓于圖兮孝亦庶而霧雨除兮神魚揚著  
魂騎上天兮涅無緇

紫岡贈華亭徐克振書其邑丞魯淵道源序後

有序

克振名振少孤哀大父母保育誨字底成立振克敬  
克事大父母及苦寢蔬食廬墓六寒暑猶一朝夕逢  
謂盡禮盡思之道振以孫行之大父母孝矣詩曰

眷眷海濱匪澤斯鹵歸岡紫土孝徐振所伊孝云何蚤  
背恃怙維大父子撫維大母子煦襲而抱鱗而膝髻墊



冠室愛猶一日乃綱乃文乃玉乃質侍靡頃失大父母  
胥喪毀瘠痛呻蔬麻由苦義弗聞親闔閭固踰禮經是  
循百六十旬絲疋有瓜孫枝有桐霜寒雨春油油千衷  
爰主維尸爰亢維宗手口澤存亦目觸涕從山始崑江  
源岷鷹豺仁人曷不人於昭者天相在爾振尚祿爾後  
雲

懷歸

石林兮畫綠池月兮夕綺將捫蘿兮采之藻我心兮懷  
歸人謂予兮娛老

最閒園辭

園有木石予從而景息匪息也景彼其予識園有禽魚  
予從而心娛匪娛也心彼其友予豈曰車無脂不良驅  
馳豈曰馬無羈及此阨危尚慎之哉草露之滋

元芝辭 有引

逢寓隱烏涇之三年七月望命兒拊蘿後園灌莽報  
有異草在椒之下卽而觀焉蓋元芝也作元芝辭  
有芝英英在園之東輪囷雲章白郭元相吾不知爲妖  
爲祥於乎猗蘭之芳聖人之傷聖人之傷小子之藏



題留侯小像

漢高三尺劔子房三寸舌剛柔兩相濟秦降楚隨滅君  
不見乾坤狡兔飛鳥秋脫使子房無世仇箕棲穎飲老  
則休

垂釣圖為窮獨叟題

麾扇渡頭芳草多投金瀨口水無波非此水不投釣非  
此草不製蓑人心其如忠義何

史驪兒

有引

驪燕人善琵琶至治開蒙上愛幸上使酒縱威福無

敢諫者一日御紫檀殿飲命驪弦而歌之驪以殿  
歡曲應制有酒神仙之句怒叱左右殺之後問驪不  
在悔曰驪以酒諷我也前和州同知李澄言于逢欲  
傳其事逢為賦一解澄字仲深開州人翰林承旨惟  
中先生從子也

虎帖耳豹俯首青天白日雷電走尚食黃羊光祿酒史  
驪曲曲春風手蕭王馬蹴滹沱冰亞父玉碎鴻門斗鳳  
凰鍛翮蚌珠剖趙女含瑟秦娥罷岳飲中八仙方下來  
御溝濺赤花飛柳君不見龍生逆鱗海嶽寒嗚呼史驪



乃敢干和州孤臣說舊語梨園弟子更新譜

送日本僧進得中遊廬山

嘗歌廬山謠既誦廬山高謫仙歐九氣兩鑿後世邈見  
詩人豪上人毛吞鯨海濤崑蓬嵩華窺秋毫香爐瀑布  
試一遨五老離立同兒曹三百六十龍象遭天燈絡繹  
長林阜我聞層巔聳峭壁字畫慘淡古鳥跡禹平水土  
紀功德廬君以來人靡識盍捫雲蘿梯磴石摩娑摸索  
爲我惜聖神洋洋酒三漉亂餘赤子甚墊溺安得再賴  
乘橈力盡九州內爲化國回首扶桑長咫尺

張節婦吳氏辭

有引

吳諱妙寧松之上海人性淑朗年廿一贅同里張氏  
子越四載邑大姓以事變坐連其父寧泣曰吾父苟  
無地爲解族其赤矣吾不遘死禍延良人悔孰甚一  
日遂雉經死未克葬徵繫吏果至聞寧死喟異而去  
時友生顧彧教授其里乃攜寧子浩來拜逢請文逢  
因書此以歸之辭曰

紅羊年黑鼠月張婦吳儼遺烈九山風酸柳波血二氣  
舛錯愁雲結百里泥途昏墊中梅花一樹驚飄雪我招



數十節義魂扁舟今過西新村歲時堂上虛鳴珮煙雨  
牆角餘縑盆篇詩爲付孝子浩四海薄俗何當敦

題姚外史草樓

黃鶴搥碎江水聲燕子空鎖苔衣生齊雲一炬亦焦土  
草樓寵辱何曾驚草樓岑然玉局湧月流大丹海流汞  
九天浩氣神與游大地八風吹不動琅璈迴度鍾磬閒  
空翠灑灑常清寒青精分食野人飯琪花獨對雷師壇  
已公之屋杜陵賦南陽之廬帝三顧君之草樓百靈護  
萬象森羅畢呈露昨者邀醉中山醪羨我脫略元龍豪  
不知誰主復誰客高枕東來午夜濤

醉贈相子先

有引

子先名禮素精弈比學黃大癡畫輒逼真近登鳳山  
睹予舊所題名因作圖見寄既解后旅次乃飲之酒  
贈之歌云

老生不能臣諸侯卻來題名鳳山頭霜晴木脫壁峭立  
鴉兒大字淋漓秋于時陳肅邵維翰隱奈薛遙睇中原  
心耳熱兩人既仕李河南鴈斷鶉啼榮夢歇邇承弈相  
游茲山三復舊記松蘿閒野僧有待碧紗護畫圖口自



傳人寰君本家西河鍾秀西湖曲龍城倚高寒鴈蕩濯  
深淥華亭道阻汎雪船乘鯁鱸買梅花前青衣童保進  
斗酒解后意氣凌吳天好將金城圖略上天子回首共  
訪巴園仙

三月十二屬予初度時客舍承朱僉樞攜僚佐見

過

我生三月之仲丁長庚輔日當奎星命居旄頭身驛馬  
薄有抱負多飄零鸚鵡嘗貫金陵酒蛟龍幸護錢塘柳  
乙酉十二月予護母櫬泊魯連海上隱行歌吳王臺前  
錢塘鄰舟多爲風潮所覆

辭下走清齋庾杲廿七種短疏劉蕢四三首才名從知

造物惡心臆空夢神人剖

乙亥科舉罷或勸予學律因感異夢見心臟皆五色遂止

茲辰客舍風雨俱湯餅尚少囊中蚨正冠試誦蓼莪什  
衝泥適來櫻筍廚帳士彈箏玉連瑣廬兒執爨貂襜褕  
落花藪藪香掃途闔座氣作思馳驅箕不以簸斗不斛  
仰面大笑眞吾徒

辭帥幕後王左丞復以淮省都事過舉且送馬至  
以詩辭還

梁欂難衝城干將難補履歷塊過都百戰材枉送懷鉛



提槩士左手控紫游韉右手執青絲鞭攫身試上文錦  
躡吳臺越苑山浪湧連城花暗搖紅煙由來得意虞失  
腳率府元僚早辭卻方圖安步徇林泉敢許橫行向沙  
漠野庭憩馬荒雞鳴馬思故櫪雄風生股勤目送使上  
道駕牛萬一至南平

登君堂奉陪秦景容郎中太夫人唐氏八十壽席  
登君堂拜君母坐君右酌君酒君冠切雲藻火綴割腴  
割鮮會昆友霞觴載稱載獻壽兩行蛾眉小垂手鼓吏  
蹀躞進軒牖清歌裊裊絲縈藕鳳蠟龍香上窈紉極南

老人星在斗老人郡封福如阜飲寒食生異白首孤孽  
疏遠及奔走陰煦春育同親厚聖經賢傳萃淵藪座閒  
雍容不去口妙年胎教君腹受所以巍科談笑取君言  
世邇厄陽九甲第紛紛沒蒿蕘湖田二頃宮一畝謝超  
宗兒孟光婦賣金養志恐少後孝行既至仍引咎嗟予  
遭亂墓失守貧賤鬱鬱此居久伯符公瑾骨已朽丈夫  
意氣誰不有願堅道義莫背負公沙昔得交杵日夜鬪  
青鳥巢堦柳微步凌波動魚符我歌跌宕君聽否出門  
大笑霜鐘吼



贈醉墨生徐貽

君不見王勃醉墨腹稟成張旭醉墨草聖鳴生也醉墨  
心醉畫落筆迴奪天人精首法米南宮繼習北苑董試  
臨老閭職貢圖頭飛鼻飲欲活動去年傳馬大夫刺馬  
常文  
郁御黃冠野服賀鑑湖今年寫鍾進士鍾律  
伯紀絕行高名  
魯男子不圖木落黃龍灣寫我弄月扁舟閒醉墨生復  
何有胸中魚鳥在沼囿所願淳風化日同上為至尊下  
萬壽千萬壽良有時殷高舊貌版築荆漢顯曾草雲臺  
姿匪生是望將誰期生載拜生鼓舞一尊來看最閒園

子鳥涇  
寓隱

三花且對江珧柱

秦筆妻 有序

筆子里人也乙未亂挈妻依同郡朱判官瑤居吳中  
筆病卒貧無以斂朱為具棺衾且思所以卹養其妻  
其妻覺泣謝曰良人筆生以藝游播紳閒詩書禮義  
之教妾亦與聞之矣妾以未亡游有累於鄉長者在  
長者義妾其於義何朱加慰之夜漏半哭益哀遂自  
經筆死所朱合葬焉

良人賣筆芙蓉市交接無非大夫士詩書禮義言熟聞



冰霜松柏操奚云亂餘良人死君託恤寡見君尤不惡  
願君葬妾良人邊夢中雙報筆如椽

題楊紘孫仲桓芝泉亭

仲桓年友今儒者雙親

父約山先生平陽人母華亭陸氏

遷葬神山下

厥土駢剛位巽乾佳氣網縕騰紫煙紫煙經宿未曾散  
周產瑞芝旁涌泉芝泉亭開但讀禮地匝紅雲石流髓  
中心一念十五霜孝格上天方有此君不見道傷骼齒  
厭鳶蠓間風或掩蘖裡恥

奉贈崔節軒同僉

崔侯昨者神與籌黑晝兔脫雙溪樓手持使節肘佩印  
歸擁萬衆雄貔貅丞相飛奏天動色詔僉僧臺安祿食  
思家遠在嵩少山拂衣卻過機雲宅機雲宅繞蓴菜碧  
故吏門生候朝夕珠樹三花一萼紅華髮千莖寸心赤  
寒波木落鴈叫霜山人鼓枹牛斗傍好峯四五青在眼  
獲其尊俎談興亡世皇混一垂百載遼金風習至今在  
會須禮樂本三王庶得兵戈清四海今春三月黃河清  
草澤正爾龍蛇橫袖中有頌未敢獻且浮大白陶餘生  
陶餘生浮大白醉裏狂言侯不責杜陵晚遇張鎬知謝



安元是桓溫客朝廷念亂徵老臣早濟斯世康斯民慎  
勿便薦王山人

簡完杭州時久雨三邊有警

吳山十日雲晦冥雨聲長驅如建瓴慎郎鬪市蚌鮎王  
羅刹錢塘江舊名洶浪魃鱉腥枯株產蘘胝芝菌總爲燮理  
乖常經黃童白叟病塗炭仰首願見台階星朝廷分寄  
屬邦牧况君牛刀新發硎曩年步取雙珠虎茲辰坐亨  
五侯鯖疎紅小翠集燕寢長楊高槐連馬坵南來瘴氣  
一灑豁萬室半起炊煙青夫差茂苑已入楚會稽孤鎮

餘岩亭烏龍

山名

陸沈蓂隕石舍葢堂奧棲流螢重闕信

問竟誰守幾夜急度軍中鈴左車未少井陘計孟堅不  
惜燕然銘我居漏室漫憂擣天末殷殷收奔霆聞君多  
在達相側必也有道安生靈嗚呼亦必有道防邊庭

聞淮安分省辟瞿睿夫錄判劉澤民李叔防二幕

長時睿夫居制先簡此詩

辛卯臣魯疏河時混一形勢先崩離甬東兒謠盧健健  
穎上童叫韓尸尸張公鴻鵠志不小繙然效順開藩維  
吳粳十萬上燕薊淮鹽千里通徐邳珠還明月光四挹



車啟賢路塵交馳士懷才謂遇知己言聽便可身親爲  
圍蔡諸道熊貔師金鼓驩亮輝旌旗斬所乘馬祭死卒  
書生獨稱天下奇側聞分省徵孝子古有杖節辭苦帷  
郡侯臨門合禮遣野客撫心殊涕洟籌邊樓深風雪遲  
駕鷺拂天雲四披連城衣食仰蒲稻鯢齒給背無子遺  
斗牛域分未全貴狼跋鹿倚憂吾私君如整裝去鄉隴  
必已注意先安危夫差爭霸禍後躡武穆保境名今垂  
軍諮記室貴無忝報政訪我龍江滑爲炊江鱸洗酒厄  
醉擬吏部元和詩

奉贈秦郎中時卜鄰橫泖

我乘太乙舟偶過袁崧宅平生兩青眼喜見有此客  
客從胄監登桂籍日下名齊雲五色躡鳧我豸十年閒  
附鳳攀龍萬方赫八閩郡縣苦兵革老弱轉爲溝壑瘠  
草中寇竊偵天險關外元勳勞石畫斗南使星夜流白  
獻可替否承帝責花門平就鉄鉞誅木灣荐貢珠琛舶  
流亡復業軍給食萱樹堂思荔枝陌陳表情同李令伯  
還家事異徐元直江妃鑿冰躍鯉魚橘包筍脯羅前除  
鴈行衣綵互勸酒鶴髮垂頂猶觀書奴躬耕稼婢織紵  
座



右章甫無時虛王珪房杜早交結愧我孤陋才空疎丈  
夫生晚世曷補墳墓亦已成榛墟行歌考槃賦遂初山  
妻操臼兒駕車卜鄰老傍曾參廬

題華亭趙氏雙慶堂

雙慶大字三尺餘書學博士米老書銀鈎鐵畫煥華詞  
野鷺家雞隨墨豬南垣從事實藏久題封遠寄趙隱居  
隱居夫婦百有七十歲慈顏童若道氣神仙如雨澄的  
的夜猶漬霜髮蕭蕭晨自梳平生種德還種樹坐見益  
擁于公閩大郎賣藥隱城市小郎謝吏歸村墟小郎奉

觴踈進酒大郎希鞶躬贈魚今日何日席不虛水蒼珮  
映青霞裾鷺羣池散晴雪滿燕子簾卷薰風初膝前玉  
語蘭解笑柳拂几杖花園興一門四世咸在侍衆賓屬  
我畱瓊琚我從去國至避地自治多難常歛歔乃翁全  
獲福善報伯氏仲氏尚慎終名譽伯仲載拜荅頌禱已  
聞帝夢遊華胥

二胡節士

有後序

列仙之癯山澤儒連璧迴映清冰壺一寒太高黃道士  
一貧不諂羅司徒古來夷齊礪風節元方季方方軌轍



祥麟威鳳不可招斷霞落日鴉明滅

二胡節士婺之永康人長穆仲次汲仲前後竝寓於  
杭穆嘗風雪高臥午未啟戶道士黃松瀑至扣之曰  
得無飢乎穆曰不飢得無寒乎穆曰不寒黃別去見  
宗陽宮杜南谷真人言其狀急饋米酒縣炭復慮不  
受不敢過多及饋臨穆曰此殆松瀑與南谷言濟吾  
飢寒耶吾固不飢不寒也卒不受汲一日文敏趙公  
來求撰羅司徒父墓銘楮鏹百定他物稱是汲曰吾  
豈爲宦官父作墓銘辭之時絕糧一日矣後趙挽詩

有云淚溼黔婁被心傷郭泰巾槩可徵矣黃台人杜  
當塗人咸有儒文行前鄉貢進士錢塘錢惟善云

目耕軒 有後序

身耕勞百骸目耕勞兩瞳身耕口體常不充目耕奚止  
穀在中所以金肅氏目耕俞塘東滿牀破書一畝宮傍  
若萬頃秋雲空蓄畬經訓信有穫鹵莽心地知無功生  
徒下淑親上侍束脩自足菽水供邇來種學道且熟蝦  
荒解兵歲荐逢稗官芻午稊說橫窗鬼出掌燈搖風卓  
哉金肅心不動卻訪謝病還山翁翁嘗舌耨苦少助忽



驚巖電超吾戎干時野淨啼飢鴻江月騰照梅花篷耕  
耶耨邪姑兩置暖腹試強新春紅贈言緯象不久聚奎  
分當與李公平章前後相輝隆

公諱好文字惟中開州東明人也幼力學家苦貧夜  
就鄰之磨坊燈讀書凡十餘年靡少懈一日值雪抵  
村舍媪貸斗黑菽媪卻曰子奚拙耕公曰吾目耕耳  
其意氣自若也既諺曰目耕夜分李好文後以明經  
登進士第累遷太常博士會至順皇帝祭太廟乘馬  
至裏橋無敢諫止者公膝行阻橋曰請皇帝下馬上

如之百官咸爲悚懼上入問左右特授禮儀使明年  
丁母王夫人憂至正閒擢國子監祭酒從容語上宜  
躬祀孔子上敬納之丞相奏重臣代由是命丞相代  
祀太牢仍以羊千角他物稱是用勉勵弟子員未幾  
上丁夜臺中丞耿屏騶從入與觀禮弟子員誤過之  
翼日耿督刑部問所過者一監騷然公曰中丞弗原  
其誤乃欲施鞭刑耶遂解印丞相以聞耿謁謝乃已  
其拜御史平反上黨義婦獄在諭德太子議拜如禮  
始與之見位省臺輔贊以道中外師重嘗進所撰



書若干卷官至翰林承旨致仕河南平章卒從子澄  
爲予言之故予錄以爲肅勸肅尚勉之哉

奉寄兀顏子忠廉使

君侯昔守常郡時九箭河頭喜相見眼驚烽急未深語  
城郭一夜寒暄變壯哉陽山土著民能爲君侯獨酣戰  
春頌王正在田野坐臥長對天北面關梁旣撤元氣回  
赤日焜耀浮雲開五花儀從紫色馬楊羅蓋擁吳門來  
中朝大夫錄殊績南省丞相收遺村方瞻福星照茗水  
又報清霜飛柏臺柏臺有詔新整飭十道司存咸率職

似聞青宮急中興尚恐巖廊事姑息頻年淆亂甚隋季  
在在諫官當任責君侯素是骨鯁臣鱗角鳳毛爲世珍  
國家深闕舊言路白簡實封宐上陳西湖二月鶯花辰  
畫船不移空綠蘋幾時重逢下車揖乞我湖陰垂釣緝

烏涇書所聞

炫晝桃編夜李陽和薰蒸露華洗託根上苑八十春汎  
豔御溝三百里香深影密覺漏遲舞隊暗消雲氣紫驚  
霜忽薄萬年樹花神爭隨北游豫細草青粘南馬足長  
楊雪眯征夫目聞者不爲此歎吁月姊赤腳驅長途行



丐尚有天黃姑

范氏義夫賢婦辭 有序

范琦字子善父竹坡居士世杭人妻瞿諱慧貞嘗粥首飾奉師教子毅宜立及歿琦年四十或勸再娶曰娶爲宗祀禮也吾有宗祀矣旣子森疑儒儕閒丁時棘艱毅恬守鄉隴宜登至正己亥江浙省備榜進士授華亭學諭立隱居教授數薦辟疾辭宜立迎父養以卒士至今多瞿之賢而重琦果於行也推爲義夫賢婦云

竹坡范氏家湖曲有子溫良婦賢淑春風于飛掌上燕  
秋霜連理庭前木三兒珠聯業章句甫具 以環溘朝露  
有琴永絕鸞膠弦無衣更著蘆花絮古不再娶華與曾  
何幸到爾遺風興始諧雌鳩卒孤鴈及見子顯孫繩繩  
巨筆誌墓其吾徵

楊女貞爲鐵厓提學作 有後序

一夕百年盟銳然東海寡婦清高堂欲奪柏舟志抔土  
淨觀貞木榮耿耿血書岌岌孝塋比境相望異代齊名  
盱江天涵白玉京剡峰壁立青雲城萬松仗夾千花迎



仙遊微落絳繚聲竝樂不苦神如生君不見西施傾國  
辱越產故妻求去羞漢卿草元閣上琴尊暇授簡刃爲  
女史評

女貞者鐵厓公之從父女弟也諱宜旣笄許陸氏子  
娶一夕卒後達官聘之宜誓不嫁母逼之閉重戶自  
盡公嘗植女貞木表墓上曹娥瑩天台王氏青峰廟  
竝比境

閻立本職貢圖爲章脩齊題

古先夏后塗山會猶有防風氏不至諸蕃朝唐何盛

臣閻躬圖毫末備想當是時干羽收日月耀衮星垂旒  
曲拳屏足僑危狀被髮偏袒羔狐裘蠕動喙息咸沾休  
自天傳世知幾載丹碧尚昭昏眇眸澄懷樓居清可羽  
罷琴題詩臨水木名園良疇繞柘湖篤志好在豳風圖

題蔡琰還漢圖

銅臺春深邊草綠琰因名父子金贖殘生旣免氈裘鬼  
哀衷莫盡蘆笳曲舊時漢妝慵復理感義懷慚歸董祀  
入朝好語亂世雄賤妾不爲天地容爾其忠事山陽公  
右軍書扇圖爲郡守理熙伯雍題



老嫗蒲葵扇道士白鷺羣蘭亭一勝會總未知右軍桓  
溫帖中二三語坐令晉鼎安如堵淝水之陣烏足數

趙仲穆待制山水爲余崑丘鍊師題

大山小山生翠寒石瀨峽東流風湍魚梁鼃臥兩崖口  
鳥道蛇折層雲端一人白駒先紫馬從者衣冠亦儒雅  
回睇星槎直上天茅堂卻在松林下吳中雪川稱絕境  
趙宋王孫畫誰竝商家孫子多服周禾黍離離見茗艸  
我來題畫神仙都城春草木稍稍蘇懷哉王孫亦已無  
懷哉王孫亦已無

題朱澤民提學山水

英宗皇帝潛邸時瀋王高麗國王薦君坐講唯天機復得  
肯綮不但怪怪還奇奇大山高寒竝王屋細路縈紆入  
斜谷卻分李靖鬃瓢漿幻出匡廬水簾瀑一時清氣  
里會兩賢中居古冠帶簷暝微籠焙茗煙溪聲遠合鳴  
秋籟東西飛閣羣林臯神往悅爾如生孫何從今日老  
此境便當上界官仙曹君兮君兮吾舊識青驃一去無  
消息好在靈巖爽翠閒荐把冰綃潑酣墨

合肥東遂菴學正爲畫君山酌月圖長歌奉謝



憶攜蓉城霞

吾鄉酒名

醉賞君山雪興酣俯屋面三醉大江

月靈奇祕怪不可說回首十年塵土熱東卿想像作此

圖如見當時眼為豁是山傑立氣皓鮮四八賓從咸華

顛

吾鄉有三十二山君山為之主

地名在

海玉臺鏡露

峨眉煙槎朽亂樹拔虎窟撇振小艇吞龍淵樵丁罷

僧罷磬木瓢一箇滄茫前君不見江山元與天地闢有

月無人景虛擲崑岷東來幾萬里衣冠雲散三千客

千客後世屢易曉事僅有羅春伯

事見郡志

龜趺禰翳鬼照

火鼇背蒼涼獸交跡君不見采石紫綺裘赤壁洞簫

樂者信曠達齷齪將如何歲云暮矣雙鬢皤夢恍茅屋

牽青蘿廣寒白兔下相杵貝闕鮫女趨鳴投卿聞大叫

當就隱指日莫問魯陽戈

謝彥明宴子西墅姚澹如為畫雙松平遠醉題圖

左

胥溪西堂雪壁立徂徠雙松忽飛入節角觶膠甲衣溼

白帝元冥氣交襲昂霄聳壑爭長雄下視棘樹嬰孩同

陶鎔自出大匠手點染不藉東皇功彷彿子落苔澗響

慘澹影掃霜林空靈根如蛇石面走女羅欲拂幽人首



千巒連雲驅陣馬一舸乘仙人牛斗洲情渚思殊未休  
我贈之歌飲之酒澹如早歲名家駒其父子敬嘗與趙公倡和學士  
趙公子以隅大歷詩指授永和帖鉤摹時康歲稔多在  
客龍顛虎斃猶爲儒酒酣笑吮老兔鬚松下添我潦倒  
夫明月滿袖春風扶

題黃大癡山水

名公望字子久杭人嘗掾中臺察院會張閻平章被誣累之得不死入

道云

十年不見黃大癡筆鋒墨瀋元氣垂絕壁雙嶺萬古鐵  
長松離立五丈旗蜀江巫峽動溟滓陰嵐夜束魚龍冷

峨眉更插空青閒差似胸中之耿耿大癡與我忘年交  
高視河嶽同兒曹天寒歲晚鴻鵠遠風雨草樹餘蕭騷  
風雨草樹餘蕭騷大癡真是人中豪

梧溪集卷第四上

吾溪集卷四上

空知不足齋叢書



